

28 OCT 2003

RAKYAT PULAU PINANG SAMBUT ABDULLAH SECARA BESAR-BESARAN SABTU INI

PULAU PINANG, 28 Okt (Bernama) -- Kepulangan Datuk Seri Datuk Seri Abdullah Ahmad Badawi sebagai perdana menteri ke negeri kelahirannya ini, yang dijadualkan pada Sabtu ini akan disambut secara meriah.

Timbalan Pengerusi Badan Perhubungan Umno Negeri Datuk Dr Hilmi Yahaya berkata, sebanyak 10,000 orang akan menyambut Abdullah di Lapangan Terbang Antarabangsa Bayan Lepas pada pukul 3.45 petang di mana Abdullah dijangka menyampaikan ucapan sulungnya sebagai Perdana Menteri.

Perdana Menteri Datuk Seri Dr Mahathir Mohamad akan menyerahkan jawatan perdana menteri kepada Abdullah Jumaat ini.

Dr Hilmi berkata, Abdullah juga akan disambut meriah dengan perbarisan rakyat di sepanjang jalan dari lapangan terbang ke Jambatan Pulau Pinang.

Beliau juga akan diiringi oleh 1,000 penunggang motosikal berkuasa tinggi ke rumah ibunya di Kepala Batas bagi majlis berbuka puasa bersama keluarganya.

Abdullah juga dijadual menunaikan solat Isyak dan Terawih di Masjid Kepala Batas.

-- BERNAMA

AZE ZS RHM